

109 年全國語文競賽客家語朗讀文章高中學生組（四縣腔）

編號 02 號

【還福請人客】曾秋梅原作

正月半，莊肚个媽祖廟在該暗晡个時會祭拜天公來起福，祈求保佑風調雨順、國泰民安，莊民身體康健。秋收過後，舊曆十月十五邊仔，廟項會舉辦盛大个祭拜儀式，來答謝各路神明保佑莊肚百姓順序平安。有起就愛有還，這儀式係兜講「還福」。

還福係六堆¹客家莊个大事，前兩日，婦人家盡無閒，愛打紅板。紅板係淨敬神用定定，還愛用紅板去邀請嫁出去个阿姑、姑婆，還有阿姆外家頭个親親戚戚來分係兜請，故所愛打當多紅板。打板仔个時節，阿姆打板仔，係兜細人仔愛搵手燒火，鑊頭水滾無異久，阿姆就會喊：「鑊蓋掀開來，用檳榔扇撥撥啊，分板仔扯氣，係無扯氣，蒸出來个紅板會像老阿婆个面，皺皺就毋靚哩喲～」紅板蒸好，就分配邀請个頭路，較遠一息仔个親戚分吾哥騎自行車去發，阿姑嫁較近，就係係這滿女仔負責送。

還福該日，朝晨八點敬阿公婆，廳下个神桌擺滷素果牲儀，比看哪房準備个較儂樣。下晝三點邊仔廟項愛普渡，係兜用「里

¹ 六堆：音 liug` dui`；包括位於屏東縣的中堆（竹田鄉）、先鋒隊（萬巒鄉）、後堆（內埔鄉）、前堆（麟洛鄉、長治鄉）、左堆（佳冬鄉、新埤鄉）、右堆（高樹鄉），以及與高樹鄉同為右堆的高雄市美濃區。

阿卡²」搵桌凳，阿姆按牲儀、金炮燭去廟坪。毋好看細莊頭，一家一張桌，桌堵桌，廟坪就擺到過路毋得，尖到滄滄个人，廟肚香火薰³到人目珠擘都毋得開。廟坪頭前還有做布袋戲，係兜細人仔拜喲過後，坐在楯頭⁴項看布袋戲，布袋戲都係講學老話聽毋識，毋過布袋人公仔弄上弄下當生趣，逐個細人仔都看到嘴勺勺仔，音響聲加紙炮聲，乒乒砰砰實在鬧熱。

還福第二日係請人客个日仔，親朋好友一打早就來坐寮也，屋下煮兩張桌請人客，對阿姑同阿姆佢兩儕來講無問題。毋多知仔灶下就傳來阿姑个聲說：「阿志牯，菜煮到差毋多哩，好裁桌⁵哩喲！」阿哥聽啊著遽遽在食飯間擺桌擺凳，阿姆同阿姑舀湯个舀湯、兜菜个兜菜。哇～全部都係好食个客家料理，係分封肉个香味錫到佇毋著，煞煞添一碗飯擺豬肉味，淨這豬肉味係就做得食兩三碗飯哩！

還福請人客，係係兜客家莊特有个俗。頭擺人講：「一代親，二代表，三代就閒了了。」故所係還係細人仔个年代，親戚有來有去个感情，就靠還福請人客來維持，也係順續仔分細人仔認識老親个方法。

² 里阿卡：音 li` a ka`；源自日語リアカ，人力手推車。

³ 薰：音 fun；用物體燃燒所產生的煙來燻別的東西。。

⁴ 楯頭：音 dun` teu`；原木段，可當凳子使用。

⁵ 裁桌：音 cai` zog`；擺桌椅。

109 年全國語文競賽客家語朗讀文章高中學生組（四縣腔）

編號 03 號

【雲】羅紫云原作

有一擺出國去寮，恁好彩分恁坐在飛行機窗門脣，該日，天時當好，看往出，阿姆哀正得，青青个天、白白个雲——青天白雲，該強強分人毋記得个記憶，做一擺分恁看著哩，深深刻印在吾个腦膈裡肚，不時會出現在夢中。

該雲个色彩仰會恁靚！有白白像當好食个綿綿冰、棉花糖，也有像軟軟會分人燒暖个白棉花，有个像嬰兒仔恁得人惜想愛偷咬一下厥紅霞紅霞个面頰卵。還有各種無共樣形投个款式，有像觀音娘坐在蓮花座上騰雲，也有像關公手擎青龍偃月刀¹大戰外星人，有像高高大大个山仔，也有像青堂瓦舍个屋仔、皇宮，還有像走當遽个車仔、馬仔，分風吹散一坵一坵像鯉嫲个魚鱗，又有像一群細人仔在運動坪打球仔、搞遊戲，還有恁多恁多講毋得出个樣式，這千姿百態恁醉人分人痴迷个畫面，就係大自然「雲」个奧妙。

研究雲个科學講安到雲物理學，這離恁忒遠哩，無法度理

解，恁就知佢係水氣飽足時所形成个，離地面近个就係像同等²面紗，看毋清楚頭前个濛煙、濛紗煙；離地面遠个就係「雲」，雲个名仔有當多種，有个雲出現毋會落水，有个雲出現會拚大雨。天頂个雲千變萬化，根據祖先个經驗諺語，就測得著天時，歇在山頂个恁，愛行路去學校讀書，故所，從細就有這個知識，打早踎床定著會企在門前向對門山看，山無戴帽仔、書包仔就輕幾下兩；係「山戴帽——有水到」，該就刻耐仔愛背水衣仔、遮仔。

尤其分恁發夢就會嚇醒个就係六月天晒穀，上煎下焗，全無好偷閃，故所就愛遽遽同穀晒燥好上倉，除忒愛煞猛耙穀、貶穀以外，還愛注意天頂雲个變化。阿爸教恁：「天頂魚鱗斑，晒穀毋使翻」；「雲向東一陣風，雲向南水連連」。看著惡雲頭出現、烏雲奔啊來，水點黏時絮絮³，噉里啪啦就落等來，耙穀、收穀毋得掣，緊張到強強會斷氣，係無拚命收穀，阿爸半年个辛苦就會分水蔭壞，歸屋人就愛承鳥屎食哩。

較早愛靠祖先个經驗傳承來測天時，做事正會順序；現下人較好命，有氣象局預報，單淨同電視、手機仔打開來就知哩。無人會自動去關心天頂个雲生到圓抑係扁，正經係時代無共樣哩。

¹ 青龍偃月刀：音 qiang' liung' ien' ngied do'；漢末三國時關羽所使用的兵器，也稱關刀。

² 同等：音 dung' den'；蒙著、蓋著。

³ 絮絮³：音 xi xi so so；狀聲詞，形容雨點散落的聲音。

109 年全國語文競賽客家語朗讀文章高中學生組（四縣腔）

編號 07 號

【時計果¹】徐姿華原作

寮日，同屋下人共下去遠山花，在路脣看著有幾攤仔農家人在該賣自家種个菜，就行前去遠遠看看啊，有晒到滄黃个筍乾、烏到出油个老蘿蔔乾、有金黃色飽米个甜包粟、浸青个笏瓜、柑紅色个大笏瓜、生來像青色玫瑰花个菠蘿菜，嫩青个香緣瓜、各色个甜椒仔，還有有特殊香氣个山當歸、山胡椒，這兜又靚又萋个菜像在該相拚，攞手愛錫人去買；菜攤仔頭前，還有用紅色細網袋仔裝等一袋一袋个時計果，該深吊菜色帶有細黃點个外皮略略仔皺皺，恬恬等曉得欣賞佢个有緣人。

恹起還細个時節，食雜無這下恁豐湧，一擺放寮，阿哥湊偈同老弟共下去大圳背竹林肚拈野生个時計果，毋過該竹林無人治理，外圍草當塞，無麼个人敢去；阿哥擎一支伐鎌、揸等袋仔，偈同老弟攞等家濟仔²、著等水靴仔，愛去竹林肚「冒險」哩！

阿哥伐開一條細路仔分偈兜行，因為竹仔生到當揸，竹林肚烏疏疏仔，幾絲日頭花仔對竹葉縫肚照入來，燥忒个竹葉貴貴攤在地泥頂，腳躡著園在燥竹葉下个竹杈還會嘩嘩噼噼，當刺激。該位正經有當多時計果，地泥下這一粒該一粒，有兜過潦³也，連

皮都綿忒也；有兜還當萋，該媿媿皺皺个外皮，一息仔都毋錫人，毋過擘開來，裡肚金黃个肉包等烏烏个仁，香香酸甜个味緒，仰會忍得核？兩下半偈就囧⁴忒一粒，還想愛尋尾，阿哥帶頭緊拈緊食，酸甜个味⁵對嘴角、手指罅流出來，實在還好食哪！偈兜賠命仔囧，一下仔歸地泥都係偈兜擲忒个殼，蚊仔也鼻著香味哩，在偈兜个耳公脣飛來飛去，叨到人這一降⁶、該一降，又癢又虐削，手黏黏越爪越癢，蚊仔也緊來緊惡，歸陣仔拈過來仰仔拈到拈毋走，硬硬都會分蚊仔扛走。

老弟分蚊仔叨到無結無煞，哇哇滾討愛轉，阿哥喊偈兜遽遽拈時計果，講愛同家濟仔裝滄正做得轉。老弟起雷追張人⁷，毋肯拈還過手賤，緊揪墜下來个時計果藤仔搞，阿哥罵佢、佢越勢挑挑，這條揪一下、該條擇⁸一下，當多旨異熟个時計果也畀揪揪下來。佢搞到當歡喜，手拉等一條藤出力擇，哼聲仔，一條比大人手指公還較大尾个燥尾喇堵好跌到厥頸根項。老弟著下驚，想愛用手去拖，阿哥手腳伶俐煞煞跳過去用竹杈同蛇哥揸開，好得阿哥反應好，無若係分該燥尾喇咬著，無死也半條命咧！

自該擺過，老弟當服阿哥，兩兄弟感情也當好；該日拈轉去个時計果，歸家人做下食得著，阿姆還用時計果來焗冰，冰涼酸甜个味緒，到今還記得。

¹ 時計果：音 to^ˇ kie so^ˋ；源自日語トケイソウ（日語漢字：時計草），百香果。

² 家濟仔：音 ga^ˊ ji e^ˋ；草編手提袋。

³ 過潦：音 go lau^ˋ；過熟。

⁴ 囧：音 fud；囧圖吞下。

⁵ 味：音 mi；湯汁。

⁶ 降：音 pong^ˋ；皮膚上因蚊蟲叮咬產生的小腫塊。

⁷ 起雷追張人：音 hi^ˋ lui^ˋ dui^ˋ diong^ˋ ngin^ˋ；使性子鬧脾氣。

⁸ 擇：音 cui；用力拉扯。

【秘密基地】林伯殷原作

逐年寒天，佢會去行屋後背个一條山路，這條山路頭站¹有打紅毛泥，看起來就像係一條普通个產業道路定定，無麼个見奇，毋過，蹶上山崁頂²，變做泥路後，這條山路黏時就轉成佢个秘密基地，見擺行入這位，佢歸隻人就變到非常鬆爽。這條路分大樹膠竹仔遮塞塞³，晒毋著麼个日頭，地泥下鋪淦淦跌下來个樹葉仔同竹葉，有兜樹仔、竹仔橫在路徑頭，有兜石礮仔同路脣个石礮崩忒咧，歸條路看起來就知無麼个人行，這下，會行這條路个人，大體就係跔跔來行山路運動个人。佢來這，除忒運動以外，還做得感受這片山林个恬靜，同時，分風吹、聽鳥鳴、看大樹、踪樹葉仔，完全聽毋著山下个車仔聲膠機器聲，久咗，佢嘎⁴起私心，毋盼得分人知這條山路，就驚忒多人來攪操⁵佢个秘密基地。

佢个秘密基地會驚人知，係因為秘密基地無恁該尋，還過，秘密基地係分忒多人知咧，該敢還係秘密基地。還細个時節搞園人尋，大家想盡辦法園起來，無愛分做鬼个人尋著，有幾儕特別

有辦法，逐擺就園到人喊「放牛食草⁶」正走出來，大家當想知佢兜園在哪位，就會偷偷仔跔等佢兜去園，毋過忒多人園共下个結果，總係兩下半就分鬼發覺著，故所，搞園人尋个時節愛當細心細意，一方面愛尋所在來園，一方面還愛提防自家園个位所會分別儕知著無？對佢來講，秘密基地毋單淨係摻自家園起來个地方定定，還較重要个係，秘密基地係放冗⁷自家个位所，在該，人做得隨在自然，無麼个愁慮，不論時間長短，就算十分鐘、半點鐘乜值⁸。

人个心情總係變去變轉，有時節想尋人坐寮、湊伴搞，有時節又想尋隻秘密基地園起來，分自家充電一下。讀國小該下，成時摻同學冤家過後，佢會自家行細路仔穿過學校崁下个竹頭，去陂塘脣打水漂仔。讀國中个時節，係講考試考毋好，佢會騎等自行車去山肚、去河壩寮。到較大兜仔，堵著想毋解个问题，佢會去圖書館搵兜仔書，無就尋隻角頭⁹个位所來恬恬坐。這下，佢好去行人少个山路。從細到大，佢隨時都有秘密基地，但係，佢毋記得秘密基地換過幾多擺咗？有兜秘密基地也早就尋毋著咧！

最尾，佢想偷偷仔請問你一下，你个秘密基地在哪位？有分人發現無？

¹ 頭站：音 teuˋ cam；前面一段。

² 山崁頂：音 sanˋ gien dangˋ；山崗上，山稜線上的高點。

³ 遮塞塞：音 zaˋ sedˋ sedˋ；遮得密密的。

⁴ 嘎：音 sa；反而。

⁵ 攪操：音 gauˋ cau；打擾。

⁶ 放牛食草：音 biong ngiuˋ siid coˋ；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。

⁷ 放冗：音 biong ngiung；放鬆。

⁸ 乜值：音 me dad；也值得。

⁹ 角頭：音 gogˋ teuˋ；角落。

【還福請人客】曾秋梅原作

正月十五元宵節，該暗晡仔，莊肚个媽祖廟子時會敬天公來祈福，祈求保佑風調雨順、國泰民安，莊民身體康健。秋收過後，舊曆十月十五邊仔，廟項會舉辦盛大个敬神儀式，來答謝各路神明保佑莊肚百姓順序平安。有祈就愛有還，這儀式俵等講「還福」。

還福係六堆客家莊个大事，前兩日，婦人家盡無閒，愛做龜板。龜板毋係淨敬神用个，還愛用龜板去邀請嫁出去个阿姑、姑婆，還有阿姆外家頭个親親戚戚來分俵等請，故所愛做蓋多龜板。阿姆做板仔个時節，俵等細人仔愛搵手燒火，鑊頭水滾無幾久，阿姆會喊：「鑊蓋掀開來，用檳榔扇撥撥啊，分板仔扯氣，係無扯氣，蒸出來个龜板會像老阿婆个面，皺當當就毋靚咩嘢。」龜板蒸好，分配邀請工作，過遠一息个親戚分吾哥騎自轉車去發，阿姑嫁過近，就俵這滿妹仔負責送。

還福該日，朝晨八點敬阿公婆，廳下¹神桌擺滿素果牲儀，比看哪家準備過俵个樣仔。下晝三點左右廟項愛渡孤，俵等用「里

¹ 廳下：音 tang' ha'；在六堆地區指的是祭拜祖先的祠堂。

阿卡²」搵桌凳，阿姆孩牲體金香紙燭去廟坪。毋好看細莊頭，一家一張桌，桌堵桌，廟坪就擺到過路毋得，尖到滿滿个人，廟肚香火煙到人目珠擘都毋得開。廟坪頭前還有做布袋戲，俵等細人仔唱喏後，坐頓頭仔³看布袋戲，布袋戲都係講學老話聽毋識，毋過布袋人公仔弄上弄下蓋趣妙，每個細人仔都看到嘴杓杓仔，音響聲加紙炮聲，並並磅磅實在鬧熱。

還福第二日係請人客个日仔，親親戚戚一大早就來坐寮咩，煮兩張桌請人客，對阿姑同阿姆佢兩儕來講無問題。無幾久灶下傳來阿姑个聲說：「阿志牯，菜煮到差毋多咩，好擺桌咩嘢！」阿哥聽啊著，共快在廊仔下⁴擺桌擺凳，阿姆同阿姑舀湯个舀湯、捧菜个捧菜。哇～全部都係好食个客家料理，俵分封肉个香味錫到佇毋著，遽啊添一碗飯擺豬肉味，淨這豬肉味俵就做得食兩三碗飯咩啦！

還福請人客，係俵等客家莊特有个風俗。頭擺人講：「一代親，二代表，三代就閒了了。」故所俵還細人个年代，親戚有來有去个感情，就靠還福請人客來維持，順續仔分細人仔認識老親个方法。

² 里阿卡：音 li' a ka'；源自日語リアカー，人力手推車。

³ 頓頭仔：音 dun' teu' e'；木製小凳子。

⁴ 廊仔下：音 long' e' ha'；屋簷下可供通行的部分。

【雲】羅紫云原作

有一擺出國去寮，恁好彩分恁坐在飛行機窗門脣，該日，天時盡好，看啊出去阿姆哀正得，青青个天白白个雲——青天白雲，該差一息分人毋記得个記憶，做一擺分恁看著地，深深刻印在恁个腦海裡背，不時會出現在夢中。

該雲个色彩仰會恁靚？有白白像盡好食个綿綿冰、棉花糖，也有像軟軟會分人燒暖个白棉花，有个像嬰兒仔恁得人惜，想愛偷咬一下紅霞紅霞个面頰卵。還有各種無共樣形仔个款式，有像觀音娘坐在蓮花座頂騰雲，有像關公手背¹青龍偃月²刀大戰外星人，有像高高大大个山，也有像青堂瓦舍个屋仔、皇宮，還有像走盡遠个車仔、馬仔，分風吹散一片一片像鯉嫲个魚鱗，又有像一陣細人仔在運動坪打球仔、搞寮，還有盡多盡多講毋得出个樣式，這千姿百態恁錫人分人痴迷个畫面，就係大自然「雲」个奧秘～。

研究雲个科學講這安到雲物理學，這離恁忒遠地，無法度理

解，恁淨知佢係水氣飽足時所造成个，離地面近个就係像戴等面紗，看毋清楚頭前个濛煙、濛露，離地面遠个就係「雲」，雲个名稱有盡多種，有个雲出現毋會落雨，有个雲會落大嫲雨。天頂个雲千變萬化，根據祖先个經驗諺語，就做得預測天時，歇在山頂个恁，愛行路去學校讀書，故所從細就有這個知識，打早起床定著會企在門前向對門山看，山無帽書包就輕幾下兩，係「山戴帽——有水到」，嘎就刻耐仔愛背水衣、遮仔。

尤其分恁發夢就會嚇醒个係六月天晒穀，上煎下焮，全無好偷閃，故所就愛遽啊同穀晒燥好入倉庫，除仔愛煞猛耙穀、搨穀以外，還愛注意天頂雲个變化。阿爸教恁：「天頂魚鱗斑，晒穀毋使翻。」、「雲向東一陣風，雲向南水連連。」看著惡雲頭出現烏雲奔啊來，雨點黏時胥胥疏松，噉哩啪啦就落等來，耙穀、收穀毋得掣，緊張到險險會斷氣，係無拚命收穀，阿爸半年个辛苦就會分雨打走，歸屋下人就愛承烏屎食地。

弄擺愛靠祖先个經驗傳承來預測天時，做事就會順序；現下人過好命，有氣象局預測發報，淨愛同電視、手機仔打開來就知地。無人會自動去關心天頂个雲生著圓抑係扁，時代斷真無共樣地。

¹ 背：音 bi；持拿、高舉。

² 偃月：音 ian` ngiad；半月形的器物。

【時計果】徐姿華原作

奈日，同屋下人共下去遠山花，在路脣看著有幾攤農家人在賣自家種个菜，就行前去遠遠看看，有晒啊蠟黃个筍乾、烏到出油个老菜脯，有金黃色踏腹个甜包黍、浸青个笏瓜、柑紅色个金瓜、生來像青色玫瑰花个高麗菜，嫩青个香櫞瓜、各色个山椒仔，還有有特殊香味个山當歸、山胡椒，這兜又靚又萋个菜像在相拚，攞手愛錫人去買。菜攤頭前，還有用紅色細網袋裝等一袋一袋个時計果¹，該深吊菜色帶有細黃點个外皮還略略仔皺皺，恬恬仔等等曉得欣賞佢个有緣人。

恁起還細該下，食雜無這下恁慘菜，一擺奈涼，阿哥邀偈同老弟共下去大圳背竹林肚拈野生个時計果，毋過該竹林無人治理，外圍草蓋塞，無麼个人敢去。阿哥背²一支伐鐮、揸等商展袋仔³，偈同老弟攞等家濟仔、著等靴筒，愛去竹林肚「冒險」也！

阿哥伐開一條細路分偈等行，因致竹仔生啊盡密，竹林肚烏烏暗暗，幾絲日頭花對竹葉縫照入來，燥核个竹葉貴貴攤在地泥下，腳躡著席在燥竹葉下个竹柁還會嘩嘩噼噼，蓋刺激。該息正

式有盡多時計果，地泥下這一粒該一粒，有兜个忒熟也，連皮都綿核，有兜个還蓋萋，該醜醜皺皺个外皮，一息都毋錫人，毋過擘開來，裡肚金黃个肉包等烏烏个子，香香酸甜个味緒，仰忍得核？三兩下就囫核一粒，還想愛討尾，阿哥帶頭緊拈緊食，酸甜个湯對嘴角、手罈項流出來，實在還好食哪！每一個人潑命囫，一下仔歸地泥都係偈等擲核个殼，蚊仔也鼻着羈⁴也，在偈等个耳公脣飛來飛去，叨到這一脰、該一脰，又癢又虐削，手黏黏越爪越癢，蚊仔也緊來緊惡，歸陣拈過來仰仔掙都掙毋走，硬硬都會分蚊仔扛走也。

老弟分蚊仔叨啊無結無煞，哇哇滾討愛歸，阿哥喊偈等遽啊拈時計果，講愛同家濟仔裝滿正使得歸，老弟頓屈打潑賴，毋肯拈還過手賤，緊揪垂下來个時計果藤搞，阿哥罵佢，佢越致剔試，這條揪一下該條捩⁵一下，蓋多毋曾熟个時計果也畀揆揆下來，佢搞啊蓋暢，手擲核一條藤出力捩，哼一聲，一條比大人手指公還過大尾个青竹絲正正跌啊厥頸根項，老弟著驚一下，想愛用手去拖，阿哥手腳伶俐一下仔跳過去用竹極同蛇哥掙開，好得阿哥反應遽。係無，分該青竹絲咬著，無死也半條命也！

對該擺過後，老弟盡服阿哥，兩兄弟感情也蓋好。該日拈歸去个時計果，歸家人聚概食得著，阿姆還用時計果來做冰，冰涼酸甜个味緒，到今還記得。

¹ 時計果：音 siĩ` gi go`；源自日語トケイソウ（日語漢字：時計草），百香果。

² 背：音 bi；持拿、高舉。

³ 商展袋仔：音 song` zan` toi` e`；農藥行送的白色尼龍方形提袋。

⁴ 羈：音 hian；氣味。

⁵ 捩：音 dui`；用力扯。

【秘密基地】林伯殷原作

每年寒天，佢會去行屋後背个一條山路，這條山路頭段¹打紅毛泥，看起來就像一條普通个產業道路定定，無麼个特別，毋過，跋上山崙頂²，變做泥路後，這條山路黏時就轉做佢个秘密基地，見擺行入這跡位，佢歸個人就變到非常鬆爽。

這條路分大樹同竹仔抵塞塞³，晒毋著麼个日頭，地泥下攤滿滿跌下來个樹葉仔同竹葉，有兜樹仔、竹仔橫在路徑項，有兜石礮同路脣个石礮斫核⁴地，歸條路看起來就知無麼个人行，這下，會行這條路个人，大體就係趑趑來行山路運動个人。佢來這，除地運動以外，還做得感受這片山林个恬靜，同時，分風吹、聽鳥仔啾、看大樹同蹬樹葉，完全聽毋著山下个車聲同機器聲，久地，佢嘎起私心，毋盼得分人知這條山路，就驚忒多人來勞攪佢个秘密基地。

佢个秘密基地會驚人知，係因為秘密基地無恁好尋，還過，秘密基地係分忒多人知地，該敢還係秘密基地。還細个時節搞屏

人尋，大家想盡辦法屏起來，無愛分做鬼个人尋著，有幾儕特別有辦法，每擺就屏到人喊「放牛食草⁵」正走出來，大家盡想知佢等屏在哪位，就會偷偷仔跔等佢等去屏，毋過忒多人屏共下个結果，總係無兩下就分鬼發覺著，故所，搞屏人尋个時節愛蓋細心細意，一方面愛尋所在來屏，一方面還愛提防自家屏个位所會分別個人知無？對佢來講，秘密基地毋單只係同自家屏起來个地方定定，過重要个係，秘密基地係放冗自家个所在，在該，人做得隨在自然，無麼个愁慮，無論時間長短，就算十分鐘、半點鐘也值。

人个心情總係變去變轉，有時節想尋人坐寮、湊伴搞，有時節又想尋一個秘密基地屏起來，分自家充電一下。讀國小該下，有時同同學吵事後，佢會自家行細路穿過學校坎下个竹頭，去陂塘脣打水漂仔。讀國中个時節，有時考試考毋好，佢會騎等自行車去山肚、去河壩寮。到大地，堵著一息問題，佢會去圖書館搵兜書，無就尋一個角頭个位所來恬恬坐。這下，佢好去行人少个山路。從細到大，佢隨時都有秘密基地，但係，佢毋記得秘密基地換過幾多擺地？有兜秘密基地也早就尋毋著地！

最尾，佢想偷偷請問你一下，你个秘密基地在哪位？有分人發現無？

¹ 頭段：音 teuˋ ton；前面一段。

² 山崙頂：音 sanˋ gien dangˋ；指山頂上。

³ 抵塞塞：音 daiˋ sedˋ sedˋ；遮得密密的。

⁴ 斫核：音 lodˋ hedˋ；崩落。

⁵ 放牛食草：音 biong ngiuˋ siid coˋ；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。

【還福請人客】曾秋梅原作

正月十五元宵節，莊肚个媽祖廟該暗晡子時會祭拜天公來祈福，祈求保佑風調雨順、國泰民安、莊民身體康健。秋收過後，舊曆十月半邊，廟肚會舉辦盛大个祭拜儀式，來答謝各路神明保佑莊肚百姓順序平安。有祈就愛有還，這儀式佢兜講「還福」。

還福係六堆客家莊个大事，前兩日，婦人家盡無閒，愛打紅板。紅板毋係斯敬神用个，還愛用紅板去邀請嫁出去个阿姑、姑婆，還過阿姆外家頭个親親戚戚來分佢兜請，所以愛打當多紅板。打板个時節，阿姆做板，佢兜細人仔愛搵手燒火，鑊頭水滾無幾久，阿姆會喊：「鑊蓋掀開來，用檳榔扇撥撥仔，分板扯氣¹，係無扯氣，炊出來个紅板會像老阿婆个面皺皮皺皮，該就毋靚哩啲！」紅板炊好，分配邀請工作，較遠一息个親戚分佢哥騎自行車去發，阿姑嫁較近，就換佢這滿女負責送。

還福該日，朝晨八點敬阿公婆，廳下神桌排恹恹个齋果牲儀，比看哪家準備較豐沛。下晝三點左右廟肚愛普渡，佢兜用

「里阿卡²」搵桌凳，阿姆核牲儀、金香紙燭去廟坪。毋好看細莊頭，一家一張桌，桌堵桌，廟坪就排到過路毋得，尖到恹恹个人，廟肚香火衝到人目珠擘都毋得開。廟坪頭前還有做布袋戲，佢兜細人仔拜好神，坐在楯頭³看布袋戲，布袋戲全部係講學老話，聽毋識，毋過布袋人公仔攘上攘下當生趣，逐隻細人仔都看到嘴勺勺仔，音響聲加紙炮聲，並並砰砰⁴實在鬧熱。

還福第二日係請人客个日仔，親親戚戚一大早就來坐寮，煮兩張桌菜請人客，對阿姑摻阿姆兩儕來講無問題。無幾久，灶下傳來阿姑个聲講：「阿志牯，菜煮到差毋多咧，好擺桌哩啲！」阿哥聽啊著煞煞在廊下排桌排凳，阿姆摻阿姑舀湯个舀湯、兜菜个兜菜。哇！全部都係好食个客家料理，佢分封肉个香味錫到佇毋著，遽遽添一碗飯攪豬肉味，單淨這豬肉味佢就做得食兩、三碗飯咧！

還福請人客，係佢兜客家莊特有个習俗。頭擺人講：「一代親，二代表，三代就閒了了。」所以在佢還細人仔个年代，親戚有來有去个感情，就靠還福請人客來維持，乜順續分細人仔認識這兜親戚。

¹ 扯氣：音 cha' hi'；使蒸氣消散。

² 里阿卡：音 li' a ka'；源自日語リアカー，人力手推車。

³ 楯頭：音 dun' teu；短木頭，用來當小凳子用。

⁴ 並並砰砰：音 bin' bin' bong' bong'；狀聲詞。

109 年全國語文競賽客家語朗讀文章高中學生組（海陸腔）

編號 3 號

【雲】羅紫云原作

有一擺出國去寮，恁好彩分僱坐在飛行機窗門脣，該日，天氣當好，看往出，阿姆哀正得，青青个天、白白个雲——青天白雲，該強強分人毋記得个記憶，做一擺分僱看著咧，深深刻印在僱个腦膈肚，長透會出現在夢中。

該雲个色彩仰會恁靚，有白白像當好食个綿綿冰、棉花糖，也有像軟軟會分人燒暖个白棉花，又有个像嬰兒恁得人惜，想愛偷咬一下佢紅霞紅霞个面頰卵。雲還有各種無共樣形投个款式，有像觀音娘坐在蓮花座頂騰雲，也有像關公手擎青龍偃月刀大戰外星人；有像高高大大个山，也有像青堂瓦舍个屋、皇宮，還有像走當遽个車仔、馬。係分風吹散，一坵一坵像鯉嫲个魚鱗，又像一群細人仔在運動坪打球仔、搞遊戲，還有恁多恁多講毋得出个樣式，這千姿百態恁醉人，分人痴迷个畫面，就係大自然「雲」个奧妙。

研究雲个科學講安到雲物理學，這離僱忒遠咧，無法度理解，僱斯知佢係水氣飽足時形成个，離地面近个就係像同等面紗，看毋清楚頭前个濛煙、濛紗煙，離地面遠个就係「雲」，雲

个名稱有當多種，有个雲出現毋會落水，有个雲出現會喊頭大水。天頂个雲千變萬化，根據祖先个經驗諺語，就做得預測天時，戴在山頂个僱，愛行路去學校讀書，所以，從細就有這種知識，打早踎床定著會企在門前向對門山看，山無帽，書包就輕幾下兩，係「山戴帽——有水到」，該就刻耐仔愛背水衣、遮仔。

尤其分僱發夢就會嚇醒个就係六月天晒穀，上煎下焗，全無好偷閃，所以就愛遽遽摺穀晒燥好上倉，除了愛煞猛耙穀、搨穀以外，還愛注意天頂雲个變化。阿爸教僱：「天頂魚鱗斑，晒穀毋使翻」；「雲向東一陣風，雲向南水連連」。看著惡雲頭出現烏雲奔啊來，水點黏時悉悉疏疏¹，噉哩啪啦斯落等來，耙穀、收穀毋得掣，緊張到強強會斷氣，係無拚命收穀，阿爸半年个辛苦就會分水打走，歸屋人就愛承烏屎食咧。

較早愛靠祖先个經驗傳承來預測天時，做事就會順序；這下人較好命，有氣象局預測發報，斯愛摺電視、手機打開來就知咧。無人會自動去關心天頂个雲生著圓抑係扁，正經時代無共樣咧。

¹ 悉悉疏疏：音 si^ˇ si^ˇ so^ˇ so^ˇ；狀聲詞。

109 年全國語文競賽客家語朗讀文章高中學生組（海陸腔）

編號 7 號

【時計果】徐姿華 原作

奈日，膠屋下人共下去遠山花，在路脣看著有幾攤農家人在該賣自家種个菜，斯行前去遠遠看看仔，有晒到黃恹恹个筍乾、烏到出油个老菜脯；有金黃色飽米个甜包粟、浸青个笏瓜、柑紅色个黃瓜，膠生來像青色玫瑰花个高麗菜，也有嫩青个香緣瓜、各色个甜椒，還過有特殊香氣个山當歸、山胡椒，這兜又靚又萋个菜，像在該相賽攞手愛錫人去買。菜攤頭前，還有用紅色細網袋張到一袋一袋个時計果¹，該深茄色帶有細黃點个外皮，還略略仔皺皺，恬恬等等曉得欣賞佢个有緣人。

想起細人仔該時，食雜無這下恁豐湧，一擺放奈，阿哥湊佢膠老弟共下去大圳背个竹園肚拈野生个時計果，毋過該竹園無人治理，外圍草當塞，無麼个人敢去。阿哥擎一支伐鎌、揸等袋仔，佢膠老弟攞等家濟袋、著等水靴，愛去竹園肚「冒險」咧！

阿哥伐開一條細路分佢兜行，因為竹仔生到當密，竹園肚烏烏暗暗，幾絲日頭花對竹葉縫晟落來，燥忒个竹葉貴貴鋪在地泥下，腳躡著圍在燥竹葉下个竹極還會嘩嘩噼噼，當刺激。該位正經有當多時計果，地泥下這一隻該一隻，有兜過潦²咧，連皮都綿

忒，有兜還當萋，該媿媿皺皺个外皮，一息都毋錫人，毋過擘開來，裡肚金黃个肉包等烏烏个子，香香酸甜个味緒，仰會忍得核？三兩下斯囫忒一隻，還想愛尋尾，阿哥帶頭緊拈緊食，酸甜个湯對嘴角、手指罅流出來，實在還好食哪！逐儕盡命拈囫，一下仔歸地泥都係佢兜擲忒个殼，蚊仔也鼻着轟咧，在佢兜个耳空脣飛來飛去，叨到這一剝、該一剝，又痲又虐削，手黏黏澁澁越爪越痲，蚊仔乜緊來緊惡，歸陣拈過來，仰般攞³都攞毋開，硬硬斯會分蚊仔扛走去。

老弟分蚊仔叨到無結無煞，哇哇滾討愛轉，阿哥喊佢兜遽遽拈時計果，講愛膠家濟袋張恹正做得轉，老弟起頓屈張人⁴，毋肯拈、手又賤，緊揪垂下來个時計果藤仔搞，阿哥罵佢、佢越發挑挑，這條揪下、該條擢⁵下，當多言幾熟个時計果也分佢揪揪下來，佢搞到當歡喜，手拉等一條藤仔出力擢，哼一聲，一尾比大人手指公還較大尾个燥尾爛的對⁶跌在佢个頸根町，老弟著下驚，想愛用手去批，阿哥手腳伶俐，一下跳過去用竹極膠蛇掙開，好得阿哥反應恁好，係無，分該燥尾爛咬著，無死也半條命咧！

自該擺過，老弟當服阿哥，兩兄弟感情也當好；該日拈轉去个時計果，歸家人全部有食著，阿姆還用時計果來焗冰，冰涼酸甜个味緒，到今還記得。

¹ 時計果：音 shi gieˋ goˊ；源自日語トケイソウ（日語漢字：時計草），百香果。

² 過潦：音 goˋ lau；過熟。

³ 攞：音 liabˋ；驅趕。

⁴ 張人：音 diongˋ ngin；違拗、使性子。

⁵ 擢：音 duiˋ；用力扯。

⁶ 的對：音 dag duiˋ；正好、準確。

【秘密基地】林伯殷原作

逐年冷天，佢會去行屋後背个一條山路，這條山路頭站¹打紅毛泥，看起來就像一條普通个產業道路定，無麼个見奇，毋過，蹶上山崁頂²，變到泥路以後，這條山路黏時就轉成佢个秘密基地，見擺行落這位，佢歸隻人就變到非常鬆爽。這條路分大樹膠竹仔遮塞塞³，晒毋著麼个日頭，地泥下鋪淦淦跌下來个樹葉膠竹葉，有兜樹仔、竹仔橫在路徑頭，有兜石礮膠路脣个石礮落忒⁴咧，歸條路看起來就知無麼个人行，這下，會行這條路个，大體就係跔跔來行山路運動个人。佢來這，除忒運動以外，還做得感受這遍山林个恬靜，同時，分風吹、聽鳥仔叫、看大樹膠蹶樹葉，完全聽毋著山下个車聲膠機器聲，久咧，佢嘎起私心，毋盼得分人知這條山路，就驚忒多人來攪躁⁵佢个秘密基地。

佢个秘密基地會驚人知，係因為秘密基地無恁該尋，還過，秘密基地係分忒多人知咧，該敢還係秘密基地。細个時節搞園人尋，大家想盡辦法園起來，無愛分做鬼个人尋著，有幾儕特別有

辦法，逐擺就園到人喊「放牛食草⁶」正走出來，大家當想知佢兜園在哪位，就會偷偷跔等佢兜去園，毋過忒多人園共下个結果，總係兩下半就分鬼發覺著，所以，搞園人尋个時節愛當細心細意，一方面愛尋所在來園，一方面還愛提防自家園个位所會分別儕知著無？對佢來講，秘密基地毋單淨係膠自家園起來个地方定，還較重要个係，秘密基地係放冗⁷自家个位所，在該，人做得隨在自然，無麼个愁慮，不論時間長短，就算十分鐘、半點鐘也值⁸。

人个心情總係變去變轉，有時節想尋人坐寮、湊伴搞，有時節又想尋隻秘密基地園起來，分自家充電一下。讀國小該下，有時膠同學冤家後，佢會自家行細路穿過學校崁下个竹頭，去陂塘脣打水漂仔。讀國中个時節，有時考試考毋好，佢會騎等自行車去山肚、去河壩寮。到大兜，堵著一兜問題，佢會去圖書館搵兜書，無斯尋隻角頭⁹个位所來恬恬坐。這下，佢好去行人少个山路。從細到大，佢隨時都有秘密基地，但係，佢毋記得秘密基地換過幾多擺咧？有兜秘密基地也早就尋毋著咧！

最尾，佢想偷偷請問你一下，你个秘密基地在哪位？有分人發現無？

¹ 頭站：音 teu cam⁺；前面一段。

² 山崁頂：音 san` gien` dang[´]；指山頂上。

³ 遮塞塞：音 zha` sed sed；遮得密密的。

⁴ 落忒：音 lau` ted；崩落。

⁵ 攪躁：音 gau` cau^ˇ；打擾。

⁶ 放牛食草：音 biong^ˇ ngiu shid` co[´]；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。

⁷ 放冗：音 biong^ˇ ngiung⁺；放鬆。

⁸ 也值：音 me^ˇ dad^ˇ；也值得。

⁹ 角頭：音 gog teu；角落。

【還福請人客】曾秋梅原作

正月半元宵節，莊肚个媽祖廟該暗晡子時，會祭拜天公來祈福，祈求保佑風調雨順、國泰民安，莊民身體康健。秋天收成過後，舊曆十月半邊，廟項會舉辦大型个祭拜儀式，來答謝各路神明保護莊肚百姓順勢平安。有祈斯有還，這儀式吾等講「還福」

「還福」¹係六堆客家莊个大事，前兩日，婦人家已無閒，愛做紅龜板。紅龜板毋係單淨敬神用，還愛用紅龜板去邀請嫁出去个阿姑、姑婆，還有阿姆妹家頭个親親戚戚來分吾等請，因致愛做當多紅龜板。阿姆打板个時節，吾等細人愛搵手掌火，鑊頭水滾無幾久，阿姆斯會喊：「鑊蓋掀開來，用檳榔扇撥撥嚟，分板落氣，若無落兜氣，炊出來个紅龜板斯會像老阿婆个面，皺腔即當毋靚款哩啲～」紅龜板炊好，阿姆會分配邀請个事頭，較遠兜个親戚分吾哥騎鐵馬去分，阿姑嫁較近，吾這滿妹斯負責送。

還福該日，朝脣八點敬祖公，廳下神桌面擺滄滄各房準備个素果牲儀，斯像在比看哪家較豐沛个樣。下晝三點邊廟項愛渡孤

魂，吾等用「里阿假²」搵桌凳，阿姆按牲儀金香、燭去廟埕。毋好看吾等這細莊頭，一家一張桌，桌堵桌，廟埕擺去過路毋得，尖滄滄个人，廟肚香煙衝都人目珠擘毋開。廟埕頭前還有做布袋戲，吾等細人拜啫了後，會搬凳頭坐緊看布袋戲，布袋戲做下講學老話聽毋識，毋過布袋人公弄上弄下當生趣，逐個細人都看去嘴開開，音響聲加紙炮聲，乒乒砰砰實在鬧熱。

還福第二日請人客，親親戚戚打早斯來坐寮，煮兩張桌請人客，對阿姑同阿姆厥兩儕來講毋係問題。無幾久灶下傳來阿姑个聲說：「阿志牯，菜煮都差毋多咧，好擺桌哩啲！」阿哥聽啊著遽遽在簷脣下擺桌凳，阿姆同阿姑舀湯个舀湯、捧菜个捧菜。哇～做下係好食个客家料理，偈分封肉个香味錫去佇毋著，遽遽添著一碗飯攤封肉味食，單淨這味偈斯食得兩三碗飯咧！

還福請人客，係吾等客家莊特有个習俗。頭擺人講：「一代親，二代表，三代閒了了。」在偈還做細人个年代，親戚有來有去个感情，斯靠還福請人客來延續，順這機會也分細人熟事老輩親戚个方法。

¹ 還福：音 van^ˇ fug^ˆ；大埔客家話用法為「還神」，音 van^ˇ shin^ˇ。

² 里阿假：音 li+ a^ˆ ga^ˆ；源自日語リア力一，人力手推車。

109 年全國語文競賽客家語朗讀文章高中學生組（大埔腔）

編號 03 號

【雲】羅紫云原作

有一擺出國祭，恁好運僱坐在飛行機窗門脣，該日，天時當好，對窗門看往出，阿姆哀正得，青青个天、白白个雲——青天白雲，該硬硬分人毋記得个記憶，這滿做一擺分僱看著咧，深深刻在吾个腦膈肚，三不二時會浮現在夢中。

該雲个色彩仰脣會恁靚～，有白白像錫人食个綿綿冰、棉花糖，也有像軟軟會分人燒暖个白色棉，有兜像得人惜个嬰兒面，分人忍毋核想愛偷咬厥該紅霞紅霞个面頰卵。另外還有各種無共樣款式个雲，有像觀音娘坐在蓮花座上騰雲，也有像關公手擎大關刀大戰外星人，有像高高个大山嫲，也有像青堂瓦舍个屋、皇宮，還有像走當遽个車、馬，分風吹散一坭一坭个斯像鯉嫲个魚鱗，又有像一陣細人在運動埕打球、搞遊戲，還有已多款式講都講毋撇，這千千百百種醉人个畫面，斯係大自然「雲」个奧妙～。

研究雲个科學講安做雲物理學，這離僱忒遠咧，無法度理解，僱單淨知佢係水氣飽足之時所產生个，離地面近个係戴面紗，看毋清楚頭前个濛紗、濛紗煙，離地面遠个係「雲」，雲个

名稱有當多種，有兜雲出現毋會落雨，有兜雲出現會有喊天斗雨¹。天頂个雲千變萬化，根據祖公輩个經驗往語肚講个，斯使得預測天時，戴在山頂个僱，愛行路去學校讀書，自細也有這方面个知識，打早跣床定著會企在門前吊望對門山，山若無戴帽，書包斯輕幾下兩，若係「山戴帽——有水到」，該斯刻耐愛背水衣、帶遮哩啲。

分僱發夢都會打著驚个斯係六月天晒穀之時，上煎下炙，全無位好偷閃，因致愛遽遽將穀晒燥好入穀倉，除了愛煞猛耙穀、搨穀以外，還愛注意天頂雲个變化。阿爸教僱：「天頂魚鱗斑，晒穀毋使翻」；「雲向東一陣風，雲向南水連連」。看著惡雲頭出現烏雲奔啊過來，兩點黏時滴滴溶溶，跔緊斯噤里啲啦落落來，耙穀、收穀都毋掣，緊張去硬硬會斷氣，若係無拚事收穀，阿爸半年个辛苦斯會打水漂，歸屋家人斯愛承烏屎食咧。

頭擺靠祖先个經驗傳承來預測天時，做事斯會順勢；現下人較好命，有氣象局預測發報，電視、手機打開來一看斯知。無人會自動去關心天頂个雲生著圓抑係扁，正經時代無共樣咧。

¹ 喊天斗雨：音 ham` tien+ deu` rhi`；傾盆大雨。

【時計果】徐姿華原作

奈日，同屋家人共下去遠山花，在路脣看著有幾攤農家人在賣自家種个菜，行前去看看，有晒去蠟黃个筍干、烏都出油个老菜脯、有金黃色飽米个甜包黍、浸青个笏瓜、柑紅色个黃瓜、生來像青色玫瑰花个高麗菜，嫩青个香緣瓜、各色个甜椒，還過有特殊香氣个山當歸、山胡椒，這兜又靚又萋个菜像在相拚，攞手愛錫人去買；菜攤頭前，還有用紅色細網袋裝核一袋一袋个時計果¹，該深吊菜色帶有細黃點个外皮還略略皺皺，恬恬等識貨欣賞佢个有緣人。

恁起細漢个時，食雜無這下恁豐湧，一擺奈涼，阿哥湊偈同老弟共下去大圳背竹林肚拈野生个時計果，毋過該竹林無人治理，草當塞，無麼个人敢去；阿哥擎一支伐鎌、揸核纒袋²，偈同老弟著水靴、攞家濟，愛去竹林肚「探險」咧！

阿哥伐開一條細路分吾等行，因致竹生去當撈，竹林肚暗摸摸，日頭花對竹葉縫肚照入來，燥撇个竹葉貴貴鋪在地泥下，腳躡著囡在燥竹葉下个竹極還會嗶嗶噼噼，當刺激；該位正經有當

多時計果，地泥下這一粒該一粒，有兜過潦³咧，連皮都綿撇，有兜還當萋，該醜醜皺皺个外皮，一屑都毋錫人，毋過擘開來，裡肚金黃个肉包緊烏烏个籽，香香酸甜个味瑞，仰脣會忍得核？三兩下斯囡撇一粒，還想愛討尾，阿哥帶頭緊拈緊食，酸甜个汁對嘴角、手指罅流出來，實在還好食哪！逐儕胚命囡，一下歸地泥都係吾等擲撇个殼，蚊也鼻著羸咧，在吾等个耳公脣飛來飛去，叮都這一降、該一降，又癢又虐削，手黏黏越爪越癢，蚊也緊來緊兇狂，歸陣拈俚來仰脣搵都搵毋離⁴，硬硬都會分蚊扛走去。

老弟分蚊叨去無結無煞，哇哇滾討愛轉，阿哥喊吾等遽遽拈時計果，講愛同家濟張滄正使得轉，老弟起頓屈張鬼⁵，毋肯拈還過手賤，緊揪垂落來个時計果藤搞，阿哥罵佢、佢越致挑挑，這條揪下該條擇⁶下，當多言已熟个時計果也畀揪揪落來，佢搞去當歡喜，手拉核一條藤出力擇，哼聲下，一尾比大人手指公還較大尾个燥尾爛正正跌落厥个頸根項，老弟著驚下，想愛用手去批，阿哥手腳伶俐一下跳過去用竹極同蛇搵開，好得阿哥反應好，若無係分該燥尾爛咬著，無死也半條命咧！

自該擺過，老弟當服阿哥，兩兄弟感情也當好；該日拈轉去个時計果，歸家人做下食得著，阿姆還用時計果來做冰，冰涼酸甜个味瑞，到今還記得。

³ 過潦：音 go` lau`；過熟。

⁴ 搵毋離：音 boi+ m` li`；揮之不去。

⁵ 張鬼：音 diong+ gui`；違拗、使性子。

⁶ 擇：音 dui`；用力扯。

¹ 時計果：音 to+ kie` so`；源自日語トケイソウ（日語漢字：時計草），百香果。

² 纒袋：音 sau+ toi`；農藥行送的白色尼龍方形提袋。

【秘密基地】林伯殷原作

逐年寒天，佢會去屋背个一條山路行，這條山路頭站¹打紅毛泥，看畀來係一條真普通个產業道路等，無麼个見奇，毋過，跋上山嶺頂²，變做泥路了後，這條山路黏時斯轉做吾个秘密基地咧，見擺行入這位，佢歸個人斯試著已鬆爽。這條路分大樹同竹遮塞塞³，晒毋著麼个日頭，地泥下鋪淦淦跌落來个樹葉、竹葉，有兜樹、竹橫在路徑頭，有兜石礮同路脣个石礮落撒⁴咧，歸條路看畀來無麼个人行，這下，會行這條路个人，大體都係跔跔來行山路運動个人。佢來這項，除了運動以外，還使得感受著這片山林个恬靜，同時，分風吹、聽鳥噉、看大樹同躡地泥下樹葉，完全聽毋著山下个車聲、機器聲，久咧，佢嘎⁵起私心，毋盼得分人知著這條山路，斯驚怕忒多人來，會攪杈⁶著吾个秘密基地。

吾个秘密基地會恁驚人知，係因致秘密基地無恁該尋，還過，秘密基地係分忒多人知著，該敢還係秘密基地。還細時節搞

園人尋，大家恁空恁路尋位園，無愛分做鬼个人尋著，有幾個特別有孔竅，逐擺都園去人喊「放空⁷」正走出來，大家當想知厥等園在哪位，斯會偷偷跔厥等去園，毋過忒多人園共下个結果，總係無兩下半斯分鬼發覺著咧，所以，搞園人尋个時節愛當細義，一來愛尋所在園，二來還愛提防自家園个所在莫分別儕知，對佢來講，秘密基地毋單淨係分自家園起來个所在忒等，還較重要个係，秘密基地係分自家放冗⁸精神个位所，在該項，人使得隨在自然，無麼个愁慮，不論時間長短，準講十分鐘、半點鐘也值⁹。

人个心情總係變去變轉，有時節想尋人坐寮、湊伴搞¹⁰，有時節又想尋一個秘密基地園畀來，分自家充電一下。讀國小該下，成半下同同學冤家了後，佢會自家行細路穿過學校崁下个竹林，去陂塘脣打水漂。讀國中个時節，一半下考試考來毋好，佢會騎鐵馬上山、去河壩寮。到較大兜，堵著有問題，佢會去圖書館搵兜書，無斯尋一個角頭¹¹个位所來恬恬坐。這下，佢好去人少个山路。從細到大，佢隨時都有秘密基地，毋過，佢毋記得秘密基地換過幾多擺咧？有兜秘密基地也早都尋毋著咧！

盡尾，佢想偷偷請問你，若个秘密基地在哪位？有分人發現無？

¹ 頭站：音 teuˋ camˋ；前面一段。

² 山嶺頂：音 san+ dungˋ denˋ；指山頂上。

³ 遮塞塞：音 zha+ sedˋ sedˋ；遮得密密的。

⁴ 落撒：音 lauˋ pedˋ；崩落。

⁵ 嘎：音 saˋ；反而。

⁶ 攪杈：音 gauˋ caˋ；打擾。

⁷ 放空：音 biongˋ kung+；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。

⁸ 放冗：音 biongˋ ngiungˋ；放鬆。

⁹ 也值：音 rha+ dadˋ；也值得。

¹⁰ 湊伴搞：音 ceuˋ pan+ gauˋ；找伴一起玩。

¹¹ 角頭：音 gogˋ teuˋ；角落。

【還福請人客】曾秋梅原作

正月十五元宵節，庄肚个媽祖廟該暗晡子時會祭拜天公來祈福，祈求保佑風調雨順、國泰民安、庄民身體健康。秋收過後，舊曆十月十五邊仔，廟項會舉辦盛大个祭拜儀式，來搭謝各路神明保佑庄肚百姓順序平安。有祈就愛有還，這儀式佢兜講「還福」。

還福係六堆客家庄个大事，前兩日，婦人家盡無閒，愛做紅板。紅板毋係淨敬神用个，還愛用紅板去邀請嫁出去个阿姑、姑婆，還有阿姆外家頭个親親戚戚來分佢兜請，所以愛做當多紅板。打板个時節，阿姆做板，佢兜細人仔愛搵手燒火，鑊頭水滾無幾久，阿姆會喊：「鑊蓋掀開來，用檳榔扇撥撥仔，分板閤下氣，係無閤氣，炊出來个紅板會像老阿婆个面，皺脂即當就毋靚哩叻～！」紅板炊好，分配邀請工作，較遠一息个親戚分佢哥騎自行車去發，阿姑嫁較近，就由佢這滿妹負責送。

還福該日，晨早八點敬阿公嬭，廳下¹神桌擺滿齋果牲儀，比脛哪家準備較豐沛个樣仔。下晝三點左右，廟項愛普渡，佢兜用

¹ 廳下：音 tenˋ haˋ；在六堆地區指的是祭拜祖先的祠堂。

「里阿卡²」搵桌凳，阿姆核牲儀、金香炮燭去廟坪。毋好脛細庄頭，一家一張桌，桌接桌，廟坪就擺到過路毋得，尖到滄滄个人，廟肚香火榮榮到人目珠擘都毋得開。廟坪頭前還有做布袋戲，佢兜細人仔拜神後，坐楯頭仔³脛布袋戲，布袋戲都係講學老話聽毋識，毋過布袋人公仔弄上弄下當心色，逐隻細人仔都脛到嘴杓杓，音響聲加紙炮聲，乒乒砰砰實在鬧熱。

還福第二日係請人客个日仔，親親戚戚一大早就來坐寮，煮兩張桌菜請人客，對阿姑摻阿姆佢兩儕來講無問題。無幾久灶下傳來阿姑个聲喊：「阿志牯，菜煮到差毋多咧，好擺桌哩叻！」阿哥聽啊著，遽遽在廊仔下⁴擺桌擺凳，阿姆摻阿姑舀湯个舀湯、兜菜个兜菜。哇～全部都係好食个客家料理，佢分封肉个香味錫到佇毋著，遽啊添一碗飯攪爌肉湯，淨這爌肉湯佢就做得食兩三碗飯啦！

還福請人客，係佢兜客家庄特有个習俗。頭擺人講：「一代親，二代表，三代就掉了了。」所以，佢還細人个年代，親戚有來有去个感情，就靠還福請人客來維持，順續乜分細人仔認識老親戚。

² 里阿卡：音 liˋ a kaˋ；源自日語リアカー，人力手推車。

³ 楯頭仔：音 dunˋ teu erˋ；木製小凳子。

⁴ 廊仔下：音 long erˋ haˋ；飯廳。

109 年全國語文競賽客家語朗讀文章高中學生組（饒平腔）

編號 03 號

【雲】羅紫云原作

有一擺出國去寮，恁好彩，分佢坐在飛行機窗門脣，該日，天氣當好，睺往出，阿姆哀正得，青青个天、白白个雲——青天白雲，該強強分人毋記得个記憶，做一擺分佢睺著咧，深深刻印在佢个腦膈肚，不時會出現在夢中。

該雲个色彩仰會恁靚～，有白白像當好食个綿綿冰、棉花糖，也有像軟軟會分人燒暖个白棉花，有个像嬰兒恁得人惜，想愛偷咬一下紅霞紅霞个面頰卵。還有各種無共樣形投个款式，有像觀音娘坐在蓮花座上騰雲，也有像關公手擎關刀大戰外星人，有像高高大大个山，也有像青堂瓦舍个屋、皇宮，還有像走當遠个車仔、馬，分風吹散一坭一坭像鯉嫲个魚鱗，又有像一群細人仔在運動坪打球仔、爽遊戲，還有恁多恁多講毋得出个樣式，這千姿百態恁錫人、分人失魂个畫面，就係大自然「雲」个奧妙～。

研究雲个科學安到雲物理學，這離佢忒遠咧，無法度理解，佢斯知佢係水氣飽足該下所變成个。離地面較近个就像戴等面紗，係睺毋清楚頭前个濛煙，離地面較遠个就係「雲」。雲个名

仔有當多種，有个雲出現毋會落雨，有个雲出現會喊頭大雨。天頂个雲千變萬化，根據祖先个經驗諺語，就做得測天時¹，戴在山頂个佢，愛行路去學校讀書，所以，從細就有這隻知識，打早跔起定著會企在門前向對門山睺，山無帽，書包就輕幾下兩，係「山戴帽會有雨到」，該就刻耐仔愛背水衣、遮仔。

尤其分佢發夢就會嚇醒个就係六月天炙穀，上煎下焗，全無好偷閃，所以就愛遽遽摺穀炙燥好上倉，除了愛煞猛耙穀、搨穀以外，還愛注意天頂雲个變化。阿爸教佢：「天頂魚鱗斑，炙穀毋使翻」；「雲向東一陣風，雲向南雨連連」。睺著惡雲頭出現，烏雲奔啊轉，雨點黏時胥胥疏疏，噉里啪啦斯跔等來，耙穀、收穀斯毋得掣，緊張到強強會斷氣，係無拚命收穀，阿爸半年个辛苦就會分水打走，歸屋人就愛承鳥屎食咧。

較早愛靠祖先个經驗傳承來測天時，做事正會順序；現下人較好命，有氣象局預報，摺電視、手機打啊開來就知咧。無人會自動去關心天頂个雲生著圓抑係扁，正經時代無共樣咧。

¹ 測天時：音 zed` tien` shi；預測天氣。

【時計果¹】徐姿華原作

奈日，膠屋下人共下去遠山花，在路脣脛著有幾攤農家人在該賣自家種个菜，斯行前去遠遠脛脛，有炙到蠟黃个筍乾、烏黠出油个老菜脯、有金黃色飽米个甜包粟、沁青个笏瓜、柑紅色个黃瓠、生來像青色玫瑰花个高麗菜，嫩青个香櫞瓜、各色个甜椒，還有香氣特殊个山當歸、山胡椒，這兜又靚又萋个菜像在該相拚，攞手愛錫人去買；菜攤頭前，還有用紅色細網仔袋張等一袋一袋个時計果²，該深茄色帶有細黃點个外皮還略略皺皺，恬恬等曉得欣賞佢个有緣人。

想起細个時節，食雜無這下恁豐湧，一擺奈寒假，阿哥湊佢膠老弟共下去大圳背竹園肚拈野生个時計果，毋過該竹園無人知理，外圍草當塞，無麼个人敢去；阿哥擎一支伐鏟、揸等袋仔，佢膠老弟攞等家濟仔、著等水靴，愛去竹園肚「冒險」咧！

阿哥伐開一條細路分佢兜行，因為竹仔生著當密，竹園肚烏烏暗暗，幾絲日頭花對竹葉縫肚照落來，燥忒个竹葉貴貴鋪在地泥下，腳躡著園在燥竹葉下个竹極還會嘩嘩噼噼，當刺激；該位

正經有當多時計果，地泥下這一粒、該一粒，有兜過潦³咧，連皮都綿忒，有兜還當萋，該媞媞皺皺个外皮，一屑都毋錫人，毋過擘開來，裡肚金黃个肉包等烏烏个子，香香酸甜个味緒，仰般會忍得核？三兩下斯囫忒一粒，還想愛尋尾，阿哥帶頭緊拈緊食，酸甜个湯對嘴角、手指罅流下來，實在還好食哪！逐儕放勢囫，一下歸地泥都係佢兜擲忒个殼，蚊仔也鼻著轟咧，在佢兜个耳空脣飛來飛去，叨到這一脰、該一脰，又癢又虐削，手黏黏越掘越癢，蚊仔也緊來緊惡，歸陣黏兼來，仰般要都要毋俐，硬硬就會分蚊仔扛走去。

老弟分蚊仔叨到無結無煞，哇哇滾追愛轉，阿哥喊佢兜遽遽拈時計果，講愛膠家濟仔張恣正做得轉，老弟起雷追張人⁴，毋肯拈，還過手賤，緊揪垂下來个時計果藤爽，阿哥罵佢、佢越挑挑，這條揪下、該條擢⁵下，當多旨熟个時計果也分佢揪揪下來，佢爽到當歡喜，手拉等一條藤出力擢，哼聲下，一條比大人手指公還較大尾个燥尾爛正正跌落佢个頸根町，老弟著驚下，想愛用手去拖，阿哥手腳伶俐一下跳過去用竹極膠蛇要開，好得阿哥反應好，無係分該燥尾爛咬著，無死也半條命咧！

自該擺過，老弟當服阿哥，兩兄弟感情也當好；該日拈轉去个時計果，歸家人做下有食著，阿姆還用時計果來做冰，冰涼酸甜个味緒，到今還記得。

¹ 時計果：音 to^ˋ kie so^ˋ；源自日語トケイソウ（日語漢字：時計草），百香果。

² 時計果：音 shi gie^ˋ go^ˋ；百香果。

³ 過潦：音 go^ˋ lau；過熟。

⁴ 張人：音 diong^ˋ ngin；違拗、使性子。

⁵ 擢：音 dui^ˋ；用力扯。

109 年全國語文競賽客家語朗讀文章高中學生組（饒平腔）

編號 09 號

【秘密基地】林伯殷原作

逐年寒天，佢會去行屋後背个一條山路，這條山路頭站¹打紅毛泥，睺起來就像一條普通个產業道路定，無麼个見奇，毋過，蹶上山崁頂²，變做泥路後，這條山路黏時就變成佢个秘密基地，見擺行落這搭仔，佢歸隻人就變到非常鬆爽。這條路分大樹膠竹仔遮塞塞³，炙毋著麼个日頭，地泥下鋪淦淦跌下來个樹葉膠竹葉，有兜樹仔、竹仔橫在路徑頭，有兜石礮膠路脣个石礮落忒⁴咧，歸條路睺起來就知無麼个人行，這下，會行這條路个人，大體就係跔跔來行山路運動个人。佢來這，除忒運動以外，還做得感受這片山林个恬靜，同時，分風吹、聽鳥啞、睺大樹膠踪樹葉，完全聽毋著山下个車聲膠機器聲，久咧，佢嘎⁵起私心，毋盼得分人知這條山路，就驚忒多人來攪躁⁶佢个秘密基地。

佢个秘密基地會驚人知，係因為秘密基地無恁該尋，還過，秘密基地係分忒多人知咧，該敢還係秘密基地。細个時節份園尋

仔，大家想盡辦法園起來，無愛分做鬼个人尋著，有幾儕特別有辦法，逐擺就園到人喊「放牛食草⁷」正走出來，大家當想知佢兜園在哪位，就會偷偷跔等佢兜去園，毋過忒多人園共下个結果，總係無兩下就分鬼發覺著，所以，份園尋仔个時節愛當細心細意，一方面愛尋所在來園，一方面還愛提防自家園个位所會分別儕知著無？對佢來講，秘密基地毋單淨係膠自家園起來个地方定定，更加重要个係，秘密基地係放冗⁸自家个位所，在該，人做得隨在自然，無麼个愁慮，不論時間長短，就算十分鐘、半點鐘乜值⁹。

人个心情總係變去變轉，有時節想尋人坐寮、湊伴爽¹⁰，有時節又想尋隻秘密基地園起來，分自家充電一下。讀國小該下，有時膠同學冤家後，佢會自家行細路穿過學校坎下个竹頭，去陂塘脣打水漂仔。讀國中个時節，有時考試考毋好，佢會騎等自行車去山肚、去溪壩寮。到大兜仔，堵著一兜問題，佢會去圖書館搵兜書，無斯尋隻角頭¹¹个位所來恬恬坐。這下，佢好去人少行个山路。從細到大，佢隨時都有秘密基地，但係，佢毋記得秘密基地換過幾多擺咧？有兜秘密基地也早就尋毋著咧！

最尾，佢想偷偷請問你一下，你个秘密基地在哪位？有分人發覺無？

¹ 頭站：音 teu cam'；前面一段。

² 山崁頂：音 san' gien` den`；指山頂上。

³ 遮塞塞：音 zha' sed` sed`；遮得密密的。

⁴ 落忒：音 lau` ted`；崩落。

⁵ 嘎：音 sa`；反而。

⁶ 攪躁：音 gau` cau`；打擾。

⁷ 放牛食草：音 biong` ngiu shed co`；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。

⁸ 放冗：音 biong` ngiung'；放鬆。

⁹ 乜值：音 me` dad；也值得。

¹⁰ 湊伴爽：音 ceu` pan` song`；找伴一起玩。

¹¹ 角頭：音 gog` teu；角落。

109 年全國語文競賽客家語朗讀文章高中學生組（詔安腔）

編號 02 號

【還神請人客】曾秋梅原作

正月十五元宵節，莊底个媽祖廟遐暗夜，子時會祭拜天公來祈福，祈求保護風調雨順、國泰民安，莊个人身體康健。到秋收了後，舊曆十月十五前後，廟會舉辦真大場个祭拜儀式，來答謝各路神明保護莊底百姓順序平安。有求即愛有還，這個儀式偌人講做「還福」，嘛有人講做「還願」。

「還福」¹係六堆客莊个大件事，進前兩日，夫娘人頭無閒，愛做龜板。龜板毋係單單拜神用个，猶愛用龜板去請嫁出去个阿姑、姑婆，猶有阿依外家个親親戚戚來得偌人請，所以愛做全然多个龜板。做板个時，阿依做板，偌人細子愛鬥相共燻火，鑊底个水滾無幾久，阿依會喊：「拗鑊蓋掀開，用檳榔扇撲撲个，得板透氣，若無透氣，炊出來个龜板會像老阿婆个面，爪皮爪皮即無靚啊～」龜板炊好，分配邀請个頭路，較遠一兜个親戚得偌哥騎鐵馬去發，阿姑嫁較近，即得偌這個滿妹負責送。

還神遐日，晨早八點拜公媽，公廳下八仙桌排滿果子牲儀，比暝哪家準備較像樣。下晝三點前後廟底愛普好兄弟，偌人用

「里阿卡²」搵桌凳，阿依擔牲儀金紙去廟坪。莫暝講細莊頭，一家一張桌，桌堵桌，廟坪即排到毋得過路，尖到滄滄个人，廟底香火埵到人目珠擘都擘毋會開。廟坪頭前猶有做布袋戲，偌人細子拜好了後，即坐凳頭暝布袋戲，布袋戲攏係講學老事聽毋識，毋過戲尅仔弄上弄落真心色，逐個細子攏暝到嘴開開，音響聲加炮聲，乒乒砰砰實在鬧熱。

還神第二日係請人客个日，親親戚戚一打早即來坐寮答訖，煮兩桌菜請人客，對阿姑和阿依佢兩儕來講無問題。無幾久灶下傳來阿姑个聲講：「阿志，菜煮到差不多啊，好排桌啊！」阿哥聽著攔緊在食飯間排桌排凳，阿依和阿姑舀湯个舀湯、捧菜个捧菜。哇～全部攏係好食个客家料理，偌得封肉个香味錫到拄毋會核，煞著添一碗飯攪封肉湯，單這封肉湯偌即會用食兩三碗飯啊！

還神請人客，係偌人客莊特有个習俗。成過人講：「一代親，二代表，三代即無了了。」所以偌猶細漢个年代，親戚有來有去个感情，即靠還神請人客來維持，順續嘛得細子熟事親戚个方法。

¹ 還福：音 bban` fu`；詔安客家話稱為「還神」。

² 里阿卡：音 li` a ka`；源自日語リアカ，人力手推車。

109 年全國語文競賽客家語朗讀文章高中學生組（詔安腔）

編號 03 號

【雲】羅紫云原作

有一擺出國去寮，足好運个得偈坐在飛機个窗門脣，遐日，天氣真好，睺出去堵好係，青青个天白白个雲——青天白雲，遐值討得人添放个記憶，做一擺得偈攞睺著啊，深深刻印在偈个頭那底，嘛不時會出現在夢境內底。

遐雲个色地仰子會恁靚～，有白白像真好食个綿綿冰、棉花糖，嘛有像軟軟會得人燒暖个白棉花，有个像阿休恁得人惜想討偷咬一下紅霞紅霞个面頰卵。猶有各種無共樣形象个款式，有像觀音娘坐在蓮花座上騰雲，嘛有像關公手擎青龍偃月刀大戰外星人，有像高大高大个山，嘛有像好額人个大瓦屋、皇宮，猶有像走足緊个車、馬，得風吹散一坭一坭像鯉魚个魚鱗，攞有像一陣細子在運動坪打球、賞，猶有足多足多講毋會出个樣式，這千姿百態恁醉人得人痴迷个畫面，即係大自然「雲」个奧妙～。

研究雲个科學講號做雲物理學，這離偈忒遠啊，無法度理解，偈單單知佢係水氣飽足个時形成个，離地面近个即係像戴著面紗，睺毋會清楚頭前个濛，離地面遠个即係「雲」，雲个名有真多種，有个雲出現毋會落雨，有个雲出現會漕大雨。天嶼个雲

千變萬化，根據祖先个經驗諺語，即會用預測天氣，蹠在山嶼偈，愛行路去學校讀書，所以，自細即有這個知識，打早落眠床定著會企在門頭前向對門个山睺，山無帽書包即輕幾下兩，若「山戴帽——會落雨」，遐即刻耐愛攞雨衫、雨傘。

尤其得偈發夢攞會驚醒个即係六月天炙穀，上煎下焗，做一下無好偷閃，所以即愛較緊拗穀炙燥好入倉，除了愛煞著猛醒耙穀、搨穀以外，猶愛注意天嶼雲个變化。阿怙教偈：「天嶼魚鱗斑，炙穀毋使翻」；「雲向東一臨風，雲向南雨連連」。睺著惡雲頭出現烏雲揸來，兩點黏時窸窸窣窣，噉里啪啦隨落落來，耙穀、收穀毋會用歇，緊張到硬硬討斷氣，若無拚命收穀，阿怙半年个辛苦即會得水流走，歸屋下个人即愛承烏屎食啊。

較早愛靠祖先个經驗傳承來預測天氣，做事正會順序；現時个人較好命，有氣象局預測發報，拗電視、手機打開來即知啊。無人會自動去關心天嶼个雲生做圓个抑係扁个，正經時代無共款啊。

109 年全國語文競賽客家語朗讀文章高中學生組（詔安腔）

編號 07 號

【百香果】徐姿華原作

歇睏日，和屋下个人共下去遊山賞水，在路脣脛著有幾下擔作穡人在賣自家種个菜，即行向前去遶遶脛脛，有炙到黃黃个筍干、烏到出油个老菜脯、有金黃色飽米个甜番麥、青青个笏瓜、柑紅色个金瓜、生來像青色玫瑰花个高麗菜，青青个香櫞瓜、各色个甜椒，猶有有特殊香味个山當歸、山胡椒，這兜又靚又萋个菜像在相拚，攞手討錫人去買；菜攤頭前，猶有用紅色細網袋裝一袋一袋个百香果，遐深茄色帶有細黃點个外皮猶略略仔皺皺，恬恬等會曉欣賞佢个有緣人。

想起細漢个時，食無這下恁豐沛，一擺歇睏，阿哥招偈和阿弟共下去大圳背个竹林內底拚野生百香果，毋過遐片竹林無人管理，外圍草芎芎，無麼个人敢去；阿哥擎一支荆鎌、揸袋，偈和阿弟攞家濟、著靴笠，討去竹林底「冒險」啊！

阿哥荆開一條細條路得偈人行，因為竹生到足密，竹林底烏烏暗暗，幾下絲日頭花對竹葉縫照入來，燥去个竹葉貴貴鋪在泥下，腳蹬著囡在燥竹葉下个竹極猶會嘩嘩噼噼，真刺激；遐位正經有真多百香果，泥下這一粒遐一粒，有一兜過分个，連皮都綿

去，有一兜猶真萋，遐稞稞皺皺个外皮，一兜仔都毋會錫人，毋過擘開來，內底金黃个肉包著烏烏个，香香酸甜个味素，仰子忍會核？兩下半即嘍一粒去，猶想討食，阿哥渡頭著面拚著面食，酸甜个湯對嘴角、手指縫流出來，實在全然好食啊！逐儕拚命囡，一下子歸泥下攞係偈人枕莫个殼，蚊嘛鼻着轟啊，在偈人个耳空脣飛來飛去，叮到這一降、遐一降，又癢又虐削，手黏黏越爪越癢，蚊嘛愈來愈野，歸陣圍佢來仰子拚都拚毋會利，硬硬討得蚊扛去。

阿弟得蚊叮到走無路，噉噉講討轉，阿哥喊偈人攔緊拚百香果，講愛拗家濟裝滄正會用轉，阿弟起癬，毋肯拚猶擱手賤，直直揪墜落來个百香果藤來賞，阿哥罵佢、佢越挑持，這條揪落遐條掣落，真多旨幾黃个百香果嘛得佢揪揪落來，佢賞到真歡喜，手揪著一條藤出力掣，噉一聲，一尾比大人手指公猶較大个燥尾堵堵好跌落佢个頸面上，阿弟著驚著，想討用手去搭，阿哥腳手伶俐一下跳過去用竹笠拗蛇拚開，好得阿哥反應好，無若係得遐燥尾咬著，無死嘛半條命啊！

自遐擺過，阿弟真服阿哥，兩兄弟感情嘛真好；遐日拚轉去个百香果，歸屋下个人做一下攞有食著，阿依猶用百香果來焗冰，冰涼酸甜个味素，到今猶記得。

【秘密基地】林伯殷原作

逐年寒天，佢會去行屋下後背个一條山路，這條山路頭前站匡紅泥，睭起來即像一條普通个產業道路定，無麼个怪奇。毋過，跋上山嶼，變做泥路了後，這條山路黏時即變成佢个秘密基地，見擺行入這位，佢歸個人即變到十分輕鬆快活。這條路得大樹和竹遮到密密，炙毋會著麼个日頭，泥下鋪淦淦跌落來个樹葉和竹葉，有一兜樹、竹橫在路頭，有一兜石領和路脣个石礮崩落去，歸條路睭起來即知無麼个人行。這下，會行這條路个人，大討即係撥工來行山路運動个人。佢來這，除了運動以外，猶會用感受這片山林个恬靜。共時，得風吹、聽鳥聲、睭大樹和蹬樹葉，做下聽毋會著山下个車聲和機器聲，久啊，佢嘎起私心，毋盼个得人知這條山路，即係驚傷多人來吵著佢个秘密基地。

佢个秘密基地會驚人知，係因為秘密基地無恁快尋。猶攔，秘密基地若得傷多人知啊，遐敢猶係秘密基地。細漢个時賞點膨嬰，大家想盡辦法藏起來，毋會用得做鬼个人尋著，有幾下儕特別有辦法，逐擺攔藏到人喊「放牛食草¹」正走出來，大家真想討

知佢人藏在哪位，即會偷偷跔著佢人去藏，毋過傷多人藏作埕个結果，總係無兩下半即得鬼發現。所以，賞點膨嬰个時愛真小心細義，一頭愛尋所在來藏，一頭猶愛提防自家藏个所在會得別儕知去無？對佢來講，秘密基地毋單係拗自家藏起來个所在定，更加重要个係，秘密基地係放鬆自家个所在，在遐，人會用隨在自然，無麼个好操煩，無論時間長短，就算十分鐘、半點鐘嘛值啊。

人个心情總係變來變去，有時務想討尋人答詔、招伴賞，有時務又想討尋一個秘密基地藏起來，得自家供電一下。讀國小个時，有時和同學冤家了後，佢會自家行細條路穿過學校崁下个竹頭，去陂塘脣打漂溜休。讀國中个時，有時務考試考無好，佢會騎著鐵馬去山底、去溪底寮。到較大兜，堵著一兜問題，佢會去圖書館搵一兜書，無即尋一個角頭个所在來恬恬坐。這滿，佢佻意去行人少个山路。自細到大，佢隨時攔有秘密基地。毋過，佢添放秘密基地換過幾多擺啊？有一兜秘密基地嘛早即尋毋會著啊！

頭尾，佢想偷偷請問你一下，你个秘密基地在哪位？有得人發現無？

¹ 放牛食草：音 biong` ngiu` shied` coo`；在此指玩捉迷藏的術語。只剩下少數人未被找到時，就可以喊這句話，提醒還在躲藏的人可以現身，遊戲要準備重新開始了。